

甯陵縣志卷之二

地理志

說者謂地理之志創於班氏而不知區土辨貢夏王允為鼻祖然第統紀大綱不若今郡邑之志臚列井井至詳且悉也其井井者何匪直曰考古證今騷人雅士藉是為憑弔之資而已凡居官之職守山川之平陂人心好尚之貞淫土宜財用之豐嗇莫不於是乎辨之是故地理有記文詞不必皆雅馴而條目不厭夫繁蹟也作地理志

沿革表

按甯陵之建置沿革舊志考覈頗為精詳今因之

甯陵世傳以為葛地唐虞以前屬豫州其邑里有無不可考夏之末葛伯始見經傳至商則無聞焉按左氏葛人來朝則葛之為名歷周末改疑湯誅仇餉者而未絕其祀故周亦因之與戰國以後則班班載籍矣乃作沿

甯陵縣志

卷之二 地理

革表使後之人知所據云 存舊

夏葛伯國 前地理云葛在陳留之甯陵一統志云葛在甯陵縣北一十五里古葛伯國河南總志載鄆城臨穎俱有葛伯城而鄆師為西亳且有嵩山未詳孰是

周 葛 左傳桓公十五年夏五月邾人牟人葛人來朝杜預云葛在梁國甯陵縣東北

戰國甯陵城 屬魏

秦甯陵城 屬碭郡一統志云甯陵即寧陵秦碭縣地漢書云碭者梁郡之縣也

漢甯陵縣 漢元狩初置甯陵屬豫州陳留郡王莽改為康善縣

東甯陵縣 屬豫州部梁國

已吾縣 屬兗州部陳留郡漢書云已吾在甯陵縣西南二十里舊為縣北齊省入下邑按東漢至東魏無慮三百年中間已吾之名不見紀載豈省入甯陵抑存其名而廢其邑也然不可考矣

三甯陵縣 屬豫州部梁國

晉甯陵縣 屬豫州部梁國

南甯陵縣 屬南豫州部南梁郡

後魏甯陵縣 屬兗州部譙郡

東魏已吾縣 屬西兗州部馬頭郡蓋更甯陵之名為已吾與

隋甯陵縣 開皇元年復置甯陵屬豫州部梁郡

唐甯陵縣 屬河南道宋州睢陽郡柘城之地省入焉

宋甯陵縣 屬南京應天府按宋史崇甯四年割應天之甯陵隸拱州六年甯陵歸南京應天府屬京西路宋應天即今歸德

金甯陵縣 屬南京路歸德府大定二十二年徙於汴河堤南至今因之古城

元甯陵縣 屬河南江北道歸德府

明甯陵縣 屬開封府歸德州嘉靖二十四年州復為府甯陵直隸歸德矣

國朝甯陵縣 仍隸歸德府

從來更置改屬民不甯居班固以邑無定名民無定里徵世變豈虛語哉

# 甯陵縣志

## 卷之二 地理

則今之安居而樂業者其吾

聖天子之賜也歟

封建表

他邑不必皆志封建也而甯陵獨志之者何仍舊志也

三葛伯爵夏所封邑也然享國滋久則誼辟必多惜爵微世遠史略之耳商代葛書紀湯革命之始故仇餉者獨聞焉然建國與除國之年亦不可考戰國信陵君考矣無忌也按杜佑云魏信陵君邑果封邑耶抑食邑耶然不可

魏甯陵君 魏從之魏庶公子也初立為甯陵君秦滅魏為庶人陳勝之王也

亂忠臣乃見今天下共叛秦于陳五反陳王乃遣谷立為魏王及章邯乘立市為王市固辭迎魏谷于陳五反陳王乃遣谷立為魏王及章邯破陳移擊魏市求救於齊楚齊遣田巴楚遣項它救之不勝遂克魏周市死之谷不忍殃其民迺與邯約降約甫定而自殺

漢甯陵夷侯 初呂臣封二十七年薨諡曰夷漢破曹谷成泉為都尉擊豨功封

戴侯 孝文十一年子戴侯謝嗣十六年薨

惠侯 孝景四年孫惠侯始嗣十七年薨

南陵公 元康四年四世孫南陵公大夫得詔復家

魏甯陵侯

曹仁操之從弟以征伐功進封陳侯增邑至三千五百戶薨諡忠侯子秦嗣轉封甯陵侯

宋甯陵侯

王僧達以歸順功封甯陵縣五等侯後無封建

疆域

我

國家幅幘之廣千古莫及合之大一統之模散之則星羅碁布於天地之間惟疆域辨而守土之責成以端互相推諉之弊以絕康王之命畢公者曰慎固封守而先之以申畫郊圻其旨不深切而著明矣乎至於戶口田賦則尤以籍爲定者也

縣在府治之西六十里東抵商邱縣界十八里南抵柘城縣界四十里西抵睢州界二十里北抵考城縣界三十里廣三十八里袤七十里爲鄉者七日長樂曰安甯曰崇義曰中和曰來遠曰遷善曰向化北觀京師陸路

# 甯陵縣志

卷之二 地理

三

一千八百一十里水路二千三百里南抵江甯府陸路一千一百里水路一千三百里東到商邱縣六十里路通江南宿州南抵柘城七十里路通陳州西至睢州五十里路通開封府北到考城七十里路通山東曹縣東南到鹿邑縣一百三十里路通江南亳州西南到太康縣一百一十里路通南陽府西北到儀封縣一百一十里路通彰德府東北到山東單縣一百七十里路通兗州府城

按舊志云明初週圍九里有奇成化年間知縣金璽割其南之半而改築約五里嘉靖十八年知縣費槃取城堞磚別用三十一年知縣石陟三十五年知縣楊侃相繼增修惟堞易坏以磚餘不能復舊年年幫補勞民傷財有損無益至萬歷年間值呂司寇家居慨然起修城之議排衆論之紛曉抒一己之苦心調停經費等項甯人無一錢之費而永免修築之害詳

見修城書載藝文志週圍拓爲六里有奇高三丈有餘全用磚包門制橋梁煥然改觀工始於知縣李庭訓告成於知縣薛大中歷三令約數年而民不知役又著有城守書邑人遵爲成法至崇禎末年流寇猖獗省陷郡破人多逃竄城半拆毀比時縣令缺員典史劉大才代管縣事糾衆復修雖堅完不能如初屢經盜賊攻圍守禦無恙皆大才之力也余讀修城書呂司寇排衆論而議修築往復開說慮遠思深一片苦心千載如見第觀其分毫隨衆一語則當日費用實以身先之而謂甯人無一錢之費可乎且歷三令約數年爲時久矣而謂民不知役則又何也志傳信不傳疑未敢阿附故論及之

門

南曰文明北曰鍾祥東曰延和西曰寶成樓四座水門二座俱南向一在旌忠廟前一在觀音寺前官水溝二道各闊一丈餘

## 甯陵縣志

卷之二 地理

四

池

在城下介於城堤之間週圍七里奇闊十丈有奇舊志載東南隅昔因有王家墳相礙未開崇禎末年知縣賀懋敬創開東南二面與別池同卽以墳前舊池抵償王氏池外原有護城小堤週圍一道今仍舊四門外板橋四座歲輒增修其必易以石庶幾一勞永逸之道耳

續修

雍正六年知縣范章京糾民重修後雖間年補葺未聞大修迄咸豐三年傾頽已甚粵匪衝陷益形廢敗八年冬知縣龍德照督民填隍功未及半通車馬處有五女牆之缺樵徑之穿不計也九年春捻匪陷城龍德照死於難黃以清權篆糾民重修歷署知縣張延齡冬月工竣廣袤仍舊完固可守光緒十五年知縣錢繩祖糾民重修至十九年知縣汪鈞澤糾民重修丁始竣門池均因舊址修浚之

堤防

按舊志云甯瀕大河每罹水患呂司寇謂有城無堤何以禦之况關廂之人豈忍爲魚經度於四關之外築堤週圍十四里高一丈五尺闊四丈五尺根係民田俱除賦稅杜便道禁芻牧頗稱堅固若是則當日之民抑何厚幸今坍塌非舊詢之父老僉曰如此者蓋數十年於茲矣議者謂不行修補將堤防之迹漸至泯沒欲行修補而勞民動衆曷可漫易舉行其說良是云

教場

舊在城北門外偏西嘉靖十四年修護城堤遂遷於南關外東共地十二畝八分七釐五毫崇禎末年知縣孟養浩又遷於東關外路北原有大廳後廳東西房門樓臺屏今無址僅存用地共八十畝

集鎮

# 甯陵縣志

## 卷之一

五

邏岡集 在縣西北三十里

趙村集 在縣東北二十里

張弓集 在縣西南三十里

陽驛集 在縣西二十里

孔家集 在縣東北二十五里

桃園集 在縣北三十五里

溝鄉集 在縣東南二十里

柳河集 在縣北三十里

石橋集 在縣北十里

桃堽集 在縣東北十二里

黃岡集 在縣西南四十里

永安集 在縣南十二里

黃家集 在縣西北三十里即趙二莊

東服集 在縣東南郭內

七星村 在縣北十八里

黃岡村 在縣南四十里

柳園村 在縣西南二十五里

丁牆村 在縣南十五里

排墓村 在縣東北十里

焦堽村 在縣北六里

馬頭村 在縣南八里

繼古村 在縣東北二十里

尖岡村 在縣西南三十五里

茅岡村 在縣西南三十里

甯靜村 在縣北十五里

鞋城村 在縣西北二十里

受益村 在縣西北三十五里

箭頭村 在縣南四十里

唐城村 在縣北三十里

陸城村 在縣西北十七里

紙坊村 在縣西北三里

楮園村 在縣北二十五里

土樓村 在縣北三十五里

黃草村 在縣東南十里

谷岡村 在縣西北四十里

火食店 在縣北二十里

王家店 在縣南十里

郭家店 在縣北二十里

小店舖 在縣西北四十里

圈子村 在縣東南二十五里

### 形勝

平衍中隱岡阜奔騰之勢坡堤外顯清漣縈繞之機右接汴梁左通鄒魯  
河洛流乎西北淮泗達乎東南可不謂當往來之衝而都水陸之會者乎  
古蹟

## 甯陵縣志

### 卷之一

大棘城 在縣西北七里左傳宋華元鄭公子歸生戰於大棘卽此

沙隨城 在縣北七里左傳魯成公會於沙隨晉銅鑾盈卽此

葛城 在縣北十五里古葛伯國

己吾城 在縣西南四十里舊爲縣

鎮頭岡 在縣南三十里

甯王城 在縣南關外至今遺址歸然

駝腰岡 在縣西南十里

甘露嶺 在縣西五里隋文帝幸岱至此甘露降

議事臺 在縣西南八里高丈餘左傳公會諸侯議事於此故名

黃龍井 在縣東八里甘露四年有黃龍二見於井中

聖水井 在縣北三里許居民修之相傳以爲唐太宗東征時道出甯陵  
失婦人所視二桶則雙井也嘉靖年間大水淤沒唯名曰聖  
然舊蹟其水甚甘鄉人療疾禱雨多應焉作亭以覆之

黃岡寺

泉今聖水夫人名號  
尚仍唐封之舊云  
魏大定二年建魏碑  
所載寺前有黃棟樹  
一株不知始生何年  
枯而復榮今又枯焉

丁牆堦堆

在縣南十五里

院主堦堆

在縣北三十里

八角井

在縣北十五里甯靜寺中其製八角圍丈餘嘉靖間井底生樹  
數月出井居民實之

褚堦堆

在縣北三十里

七星堦堆

在縣西北三十里

齊王廟

在縣北二十里世傳齊威王朝周道卒於此居人立廟祀之

汴堤

一名隋堤在縣東十里鋪官路北曹家墳後高阜巍然

賈魯堤

元尚書賈魯築以障水遺跡隱然在縣南七里

苗公河

苗公時中主甯陵簿所疏民甚利之因以名河

汴河

一名睢河當縣之衝由陳留下達於徐

甯陵縣志

卷之二

石

橋在縣北十里

焦剛堆

在縣北六里

童餉堦堆

在城南二里又名童相磚包高丈餘寬四丈餘長五丈餘今上  
祀大士

續修

王公泉

王公諱世仕字惠甫仲號緝堂貴州貴筑人由翰林典試福建事  
竣旋都授我甯邑甫蒞政卽留心作養踵前書院而擴大之煥  
然極最屬之觀西之別墅蒔花樹木以取清幽乃掘地得泉不  
過也又復構院西之別墅蒔花樹木以取清幽乃掘地得泉不  
效厥靈此固我公德化之所感亦甯邑人文應運當興詎不盛  
哉遠近稱之爲瑞鑿井以垂永久而鑄其人石曰王公泉蓋謂公  
之深仁厚澤若井養而不可窮邑人作亭以寶之亦猶是甘棠  
棠竹之遺相傳正未有艾也夫乾隆二十年歲次乙亥立石  
碑在縣治故址

黑龍潭

在城西南四十里壽峯寺前東有古井每逢歲旱浚井掘潭靈  
雨輒應庠生重逢遊泮郭豐啓爲之記

# 寧陵縣交通概況圖

## 民權縣



中華民國三十年六月製

圖例

- 縣城
- 集鎮
- ⌒ 橋樑
- ▬ 公路
- ▬ 鐵路
- ▬ 電線
- ▬ 縣界

柘城縣



河防

韋家河 在縣北十二里趙皮寨支河衝今壩

桃園河 在縣北三十里趙皮寨支河衝今壩

張弓河 在縣南三十里趙皮寨支河衝今壩純仁創建磚橋五空有記見藝文志係汴亳孔道鄉飲者資路

八里屯河 在縣南八里趙皮寨支河衝今壩

陽驛河 在縣西二十里趙皮寨支河衝今壩

五里堡河 正德四年侍郎崔巖開今壩

縣北關河 嘉靖五年都御史盛應期開今壩

東南之民憂食者寡多水利故也余驟閱甯陵志見夫載河若干處心竊喜之及按籍而求雖深溝無有也何河之有然舊志載其衝闢頗詳意固有在未可刪也

黃河集考 焯原志

甯陵縣志

卷之二

明正德四年河決楊家口侍郎崔巖乃於祥符董盆口甯陵五里堡各開地四十里接黃河故道引水由鳳陽達亳州又濬孫家渡故道十餘里引水由朱仙鎮至壽州而各入於淮疏賈魯舊河四十餘里以殺水勢築梁靖口下埽以防衝決會霖雨暴漲新築臺埽遂蕩然無遺矣

正德八年侍郎趙璜疏分水須水二河先因崔巖功弗就河遂衝決益甚至是璜乃於滎澤東濬分水河鄭州西鑿須水河疏亳州河渠自是水勢漸殺不為害

嘉靖五年都御史盛應期疏趙皮寨支河綿亘數百里以濟運道是時趙皮寨為上流其地視河高數尺而其土又皆沙也隨疏隨淤久之功弗成應期憂之乃日夜止宿水次復益夫數萬治之益弗就百姓怨咨於是應期坐議免歸

嘉靖七年學士霍韜上治河疏其略曰臣前過徐州聞議者欲引河自蘭

陽至於宿遷以爲可殺河勢庶徐沛不致暴溢運道不致沙淤也夫水溢徐沛猶有呂梁二洪爲之束捍東北諸山爲之防垣水患所及尙有底極若引河自蘭陽注宿遷則歸德諸處河溢奔潰將數郡一壑其患不止徐沛二州縣而已也上然其議

嘉靖三十年都御史方鈍采僉論上疏其略曰趙皮寨一開河性叵測不可限量設使全流南徙不惟二洪涸竭有干運道而勢趨鳳泗則又憂在陵寢矣若疏孫家渡雖云省易而壽春王家園密邇淮河衝決之患亦不可不慮况宏治迄今凡十有五濬矣卒莫有成今聖德格天川瀆效靈舟楫通利生民奠安似宜罷爲便上嘉納之

嘉靖三十二年間漕渠稍滯議者復申前說上命侍郎吳鵬來視鵬自蘭陽而南抵泗上相其地形水勢乃奏曰竊見黃河上流開濬趙皮寨約三百九十餘里計役夫一十八萬六千有奇工費鉅大實難遽圖孫家渡所

## 甯陵縣志

### 卷之二

九

淤塞者僅六里八十丈計役夫九百有奇其費省而爲力頗易取之河道亦自足用不煩別爲措辦宜行司河者祇除淤土四尺七寸照舊不必開濬其高阜陂陀之處盡爲挑治一概使平水小則聽其歸漕順流水大則任其泛溢平漫其河北隄障劉獸醫口張家灣筒瓦廂崔家壩等處俱應隨宜修築疏上制曰可自是開濬之議遂寢

續修  
舊沙河在縣西十里亦名新開河年久淤塞乾隆十六年知縣梁景程奉檄疏濬始通見府志今堦

呂家窪溝在城南十五里自呂家窪起由王家莊高家樓史家塋入商邱境西南王家橋河而寬七尺長九百四十丈深五尺乾隆十七年知縣梁景程奉檄開濬見府志

郭家樓溝在城東南二十里自郭家樓起迤邐入商邱境西南賈家河面

寬七尺長一百八十丈深五尺乾隆十七年知縣梁景程奉檄開濬見府志

何家窪溝在城東北十二里自何家窪起由桃家莊李家莊入商邱縣東北馬沈莊止面寬一丈長七百五十丈深五尺乾隆十七年知縣梁景程奉檄開濬見府志

筱河溝在遷善鄉九十兩野康熙閒鄉人疏濬自孟家窰起由喬新莊王大莊李君崇入張家橋河面寬三丈長十里餘淺深不等道光閒鄉紳王春芳等修濬光緒十年鄉紳郭尙安等修濬上僅及喬新莊風俗

古者太史採詩以觀民風凡奢淫儉嗇祇以一二歌詠之詞概之不過得其大意而止且又不能不變也如曰今之民猶古之民則唐虞三代之風至今存可也迺

## 甯陵縣志

### 卷之二

十

聖天子在上輒塵

睿慮制爲

聖諭十有六條布告天下而

大中丞閣公更加詳註且通以方言家諭戶曉不一而足蓋爲世道人心計至悉也甯陵自漢迄今風俗純澆不知其幾變而一統志稱忠義之風仁厚之俗卽按厥舊志所引述亦無大異藉非溢美將君子有欣慕焉何由今觀之又多悍而好逞豈矯激之過積漸使然詩書禮義之氣未洽歟成王命君陳者曰爾惟風下民惟草然則剛克柔克上民者端必有所以轉移勸導之者也歲時伏臘志其概耳

正月元日

早起祀內外神拜家慶畢徧謁親友謂之拜節三日展墓

上元日

張燈燭放火花明日男出遊女歸甯曰走百病

二月二日

以青灰繞布宅舍云避毒蟲稼果木以爲多實

三月三日 種葫蘆梅雨宜接梅杏桃李

清明日 加土於墳墓上掛紙設牲醴名曰上墳

五月五日 食角黍飲菖蒲酒貼符插艾饋師遺女

六月六日 曝百物云虫不蛀

七月十五日 插蔗穀展墓

八月十五日 供瓜餅家慶合歡謂之圓月

九月九日 賞菊餽師遺女

十月一日 展墓罷傭作

十一月冬至日 祭先遺女

十二月八日 食臘粥髡小兒

二十三日 掃舍祀竈

除 夕貼門神桃符詣墳墓迎祖先辭歲多嫁娶以為無忌

# 甯陵縣志

## 卷之二

### 土產

燕趙多慷慨之士吳越有俊秀之民皆產於土者也豈獨豫章之木鄧林之材已哉雖然先王底慎財賦不責有於無不取盈於寡唯土產有志而後居山者可不以魚鱉為禮居澤者可不以鹿豕為禮矣

### 穀類

黍 稷 麥 粦 蕎麥 菊秫 芝蔴 青豆

黃豆 黑豆 綠豆

### 蔬類

芥 芹 蔓青 菠菜 葫蘆 蘿蔔 白菜 地瓜

葱 蒜 韭菜 茄 西瓜 冬瓜 甜瓜 南瓜 絲瓜

眉豆 蒿苳

### 菓類

黃李 杏 桃 柿子 胡桃 梨 棗 梅子 蘋菓

花紅 石榴 甜子

木類

榆 柳 桑 槐

獸類

牛 馬 驢 騾 犬 豕 貓 羊

禽類

雞 鵝 鴨 鴿

甯陵縣志

卷之二